

Padu del Caribe,

nos tata di cultura celebrando awe su 87 cumpleaños

ORANJESTAD—Famia Lampe y Aruba henter sin duda algun ta di fiesta awe. Ya cu e tata di nos cultura Sr. Juan Chabaya 'Padu del Caribe' ta cumpliendo su di 87 cumpleaños. Na honor di su cumpleaños Bon Dia Aruba a dicidi di pone un tiki luz riba e bida y logro di gran musico y persona aki cu ta sumamente importante den e desaroyo di e cultura di Aruba.

Juan Chabaya Lampe, un nomber cu porta cu lo por zona straño den nos horea ya cu nos conoce mas bien como Padu of Padu del Caribe. Considera y reconoci como e tata di nos cultura Padu a sa di destaca den diferente ramo den e mundo di arte na Aruba y internacional y su logro di mas grandi ta un cu nos tur conoce y ta stima masha di henter nos curazon esta 'Aruba dushi tera'. E logro mas grandi di Padu cu Aruba nunca lo lubida ta e participacion den e composicion di nos Himno di Aruba, "Aruba Dushi Tera".

Despues di añanan den e bida farandulero el a haya un nomber popular cual ta Padu del Caribe, asina tabata yama su programa na television tambe. Padu semper a lanta cu masha hopi alegria y musica pesei mes na un edad basta hoben el siña domina diferente instrumento. Instrumentonan cu Padu ta domina ta mandolin,

piano, clarinet y cuarta. Sr. Rufo Wever (d.f.m.) a sirbi como inspiracion pa Padu y for di e momento ey el a cuminsa bai les piano y practica e instrumento aki pa asina e ta e genio musical cu e ta awendia. Padu tin un forma masha unico di hinca su cancionnan den otro, tur cos ta cuminsa riba su cuarta, unda cu e ta traha e melodia pa despues e pasa esaki over riba su piano y ora cu esaki ta cla e ta cuminsa pone letra pa e cancion. Padu ta un artista Internacional cu a presenta diferente caminda tanto den Caribe manera Corsou, Boneiro, Jamaica, como tambe paisnan Latino manera Venezuela, Colombia, Puerto

Rico, Republica Dominicano, Cuba, y tambe na Merca na ciudadnan manera Miami, New York y tambe Canada.

Na 1952 Padu y Rufo (d.f.m.) kier a expresa nan amor pa nan pais. Nan dominio tremendo den musica a inspira nan pa compone un cantica, cu tabata un wals cu awe nos tur conoce como 'Aruba Dushi Tera'. E dos genio musical aki a sinti cu e tabata un cancion suficientemente bon pa wordo graba y a cuminsa recluta su hendenan pa haci un grabacion. Padu a tuma e parti di piano, y 'De trupialen' a canta bou di



direccion di Frere Alexius den e studionan di grabacion di Radio Kelkboom. Asina loke cu awe nos conoce como nos Himno Nacional a cuminsa manera un cancion bunita cu tabata demostra e amor cu nos tur tin pa nos dushi isla.

Despues di casi 6 luna cu a manda e peticion pa haci e cancion aki himno nacional Parlamento a dicidi di haci e cancion aki oficial. Dia 16 di maart 1976 e gobernantenan di Aruba a oficialisa "Aruba Dushi Tera" como himno nacional di Aruba. Despues di dos dia nan a forma un manifestacion den Wilhelmina Stadion. Mas cu 10.000 hende a presenta pa asina tende e cancion bira oficialmente e himno nacional di Aruba. E himno a wordo canta pa e coro hubenil bou direccion di Sra. Maybeline Arends-Croes acompaña pa e Orquesta Filharmonica Arubano bou direccion di Sr. Joy Kock. Y desde e dia ey 18 di maart ta un dia nacional pa nos tur celebrando nos Dia di Himno y Bandera.

Padu, durante di su añanan den e mundo di arte no a keda solamente den e mundo di musica pero el a desaroya su mes no otro facettanan di arte tambe. Nan un edad mas grandi Padu a

cuminsa skirbi buki y a presenta bukinan manera 'The Third Element' y 'Harmoniology'. Banda di esei Padu a desaroya su mes den e mundo di pintura y ta bon conoci den e mundo di pintamento y a yega di participa na varios exposicion y ta reconoci pa pinturanan masha bunita mes riba canvas cu verf di zeta. Banda di tur esakinan Padu tin varios otro logro masha importante como tambe homenahe nan na cantidad grandi cu a wordo dedica na su persona. E reconocimiento nan aki a yega na su persona tanto localmente como internacionalmente. Durante di su añanan como musico Padu a produci un total di 11 disco. Personalmente Padu tabata tin otro logronan masha importante na 1972 Padu a wordo condecora como 'Ridder ban Oranje' y na 2000 el a ricibi su di dos condecoracion como 'Officier in de Orde van Oranje Nassau'.

E mester ta un orguyo masha grandi mes pa cada Arubiano di por bisa cu e 'Tata di nos Cultura' Juan Chabaya 'Padu del Caribe' Lampe ainda ta hunto cu nos y cu Padu a haci nos isla destaca den su orbanan como escritor, cantante, musico, compositor, poeta, pintor, filosofu y un gran persona.